



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2017. GODINU **HRVATSKE DEMOKRATSKE ZAJEDNICE 1990**

Broj: 03-07-6-404/18
Sarajevo, 20.09.2019. godine

SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA.....	4
Predmet pregleda i kontrole.....	4
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI	5
5.2 PREPORUKE.....	9

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Hrvatske demokratske zajednice 1990 za 2017. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2017. godinu, utvrđeno je da je Hrvatska demokratska zajednica 1990 prekršila odredbe člana 11. stav (1) i člana 12. Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Hrvatske demokratske zajednice 1990 za 2017. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska demokratska zajednica 1990 se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	554,00	0,10
2.	Prilozi fizičkih lica (3-a)	6.300,00	1,15
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	1.200,00	0,22
7.	Prihodi iz budžeta (3-f)	530.695,70	97,16
8.	Prihodi od propagande (3-g)	0,00	0,00
I	Ukupni prihodi (1-8)	538.749,70	98,64
II	Ostali prihodi i drugo	7.448,55	1,36
	Izvori finansiranja (I+II)	546.198,25	100,00

U godišnjem finansijskom izvještaju stranka je iskazala rashode u ukupnom iznosu od 451.280,11 KM.

2. PREDSTAVLJANJE POLITIČKE STRANKE

Naziv političke stranke je Hrvatska demokratska zajednica 1990. Skraćeni naziv stranke je HDZ 1990.

Hrvatska demokratska zajednica 1990 je registrovana kod Kantonalnog suda u Mostaru, rješenjem broj: 007-0-R-06-000031 od 13.04.2006. godine.

Sjedište stanke je u Mostaru, Kneza Branimira 2.

Lice ovlašteno za zastupanje Hrvatske demokratske zajednice 1990 je Ilija Cvitanović, predsjednik stranke.

Lice ovlašteno za podnošenje finansijskih izvještaja za 2017. godinu je Marijana Markotić.

Prema podacima iz godišnjeg finansijskog izvještaja za 2017. godinu, organizacionu strukturu Hrvatske demokratske zajednice 1990 čine:

- Središnji odbor,
- 7 županijskih/kantonalnih odbora,
- 3 gradska odbora i
- 34 općinska odbora.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske demokratske zajednice 1990 za 2017. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskog izvještaja Hrvatske demokratske zajednice 1990 obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Hrvatske demokratske zajednice 1990 u periodu od 2006. do 2016. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršene revizije godišnjeg finansijskog izvještaja za 2016. godinu, Služba za reviziju je izdala Izvještaj o reviziji sa mišljenjem revizora, nalazima revizije i preporukama stranci da finansijska sredstva troši u skladu sa planom utroška sredstava, da priloge pravnih lica uplaćuje na transakcijski račun Središnjeg odbora stranke, da se ne finansira iz izvora, koji su zabranjeni političkim strankama, da poslovne knjige vodi u skladu sa računovodstvenim propisima, odnosno da uspostavi tačne evidencije o prihodima, rashodima i obavezama stranke i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2017. godinu, utvrđeno je da Hrvatska demokratska zajednica 1990 nije ispoštovala sve preporuke.

5. NALAZI I PREPORUKE

5.1 NALAZI

Hrvatska demokratska zajednica 1990 prekršila je odredbe člana 11. stav (1) i člana 12. Zakona o finansiranju političkih stranaka.

Hrvatska demokratska zajednica 1990 nije u poslovnim knjigama uspostavila potpune i tačne evidencije o novčanim tokovima, prihodima, rashodima i obavezama stranke na dan 31.12.2017. godine i nije popunila obrasce godišnjeg finansijskog izvještaja za 2017. godinu u skladu sa odredbama Pravilnika o godišnjim finansijskim izvještajima političkih stranaka-u daljem tekstu: Pravilnik, čime je prekršila računovodstvene propise i odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- (1) Uvidom u poslovne knjige Hrvatske demokratske zajednice 1990 utvrđeno je da stranka u okviru Glavne knjige vodi evidencije za sve organizacione odbore, i to na način da evidentira poslovne promjene za Središnji odbor stranke, dok poslovne promjene za niže organizacione dijelove evidentira na kraju poslovne godine, kada knjiži ukupan iznos prihoda i rashoda na analitičke kartice konta prihoda i rashoda, kao i ukupan promet po kontima računa, blagajne, osnovnih sredstava i drugih pozicija aktive i pasive.

Služba za reviziju je utvrdila da stranka u poslovnim knjigama nije obuhvatila sve poslovne događaje, tako da ni u godišnjem finansijskom izvještaju nisu iskazani tačni i potpuni podaci o prihodima, rashodima i obavezama, kao ni podaci o novčanim tokovima. Osim navedenog, utvrđeno je da stranka na dan 31.12.2017. godine na kontu 10150-Prelazni račun-unutar stranke ima saldo 5.413,08 KM, što ukazuje da poslovne knjige nisu vođene na pravilan način.

(2) Politička stranka u obrascu 2 (pregled prometa svih transakcijskih računa političke stranke) finansijskog izvještaja nije prijavila sve transakcijske račune i nije adekvatno iskazala promet po transakcijskim računima, čime je prekršila odredbe člana 11. Pravilnika.

- Stranka je u poslovnim knjigama i finansijskom izvještaju iskazala pogrešan promet ostvaren putem transakcijskog računa OO Široki Brijeg broj: 3382202201114941 kod UniCredit Bank dd.

Uvidom u izvode sa navedenog transakcijskog računa utvrđeno je sljedeće: negativan početni saldo u iznosu od 7,93 KM, ukupan promet ulaza u iznosu od 4.200,00 KM, ukupan promet izlaza u iznosu od 4.201,01 KM, te negativan saldo na dan 30.11.2017. godine u iznosu od 8,94 KM¹.

Stranka je, međutim, u poslovnim knjigama i obrascu 2 godišnjeg finansijskog izvještaja iskazala početni saldo u iznosu od 0,02 KM, ukupan promet ulaza u iznosu od 2.992,05 KM, ukupan promet izlaza u iznosu od 3.005,00 KM, te negativan saldo na dan 31.12.2017. godine u iznosu od 12,93 KM.

- Uvidom u obrazac 2 utvrđeno je da stranka nije iskazala tačne podatke o broju transakcijskog računa OO Uskoplje i promet ostvaren putem ovog računa u 2017. godini. Stranka je u godišnjem finansijskom izvještaju navela transakcijski račun koji sadrži 15 (petnaest) cifara, što ukazuje da broj računa nije pravilno iskazan².

Stranka, takođe, u obrascu 2 nije iskazala promet, iako je putem ovog računa primila sredstva iz budžeta Općine Gornji Vakuf-Uskoplje u iznosu od 8.112,00 KM. Služba za reviziju je utvrdila da je stranka u poslovnim knjigama evidentirala početno stanje na dan 01.01.2017. godine u iznosu od 684,80 KM, odnosno stanje na dan 31.12.2017. godine u istom iznosu.

- Stranka u obrascu 2 godišnjeg finansijskog izvještaja nije iskazala podatke o prometu ostvarenom putem transakcijskog računa OO HDZ 1990 Domaljevac-Šamac broj: 3060430000510896 kod Addiko Bank dd. Prema podacima koje je dostavila Općina Domaljevac-Šamac, na ovaj transakcijski račun su u toku 2017. godine uplaćena sredstva iz budžeta ove općine u iznosu od 2.000,00 KM. Stranka je u poslovnim knjigama evidentirala samo početno stanje novca na dan 01.01.2017. godine u iznosu od 4.405,79 KM, što odgovara i stanju na dan 31.12.2017. godine.

- U godišnjem finansijskom izvještaju stranka nije iskazala podatke o transakcijskom računu broj: 33823002263383116 kod UniCredit bank dd na koji su uplaćena sredstva iz budžeta Općine Tomislavgrad.

Služba za reviziju je utvrdila da je stranka u obrascu 2, kao i za OO Uskoplje, navela pogrešne podatke o transakcijskom računu OO Tomislavgrad, tj. navela je transakcijski račun koji sadrži 15 (petnaest) cifara.

- Pored navedenog, utvrđeno je da je stranka u godišnjem finansijskom izvještaju iskazala transakcijski računi ŽO ZHŽ Posušje koji sadrži 17 (sedamnaest) cifara.

- Uvidom u Izvještaj Centralne banke Bosne i Hercegovine o računima pravnog lica, utvrđeno je da stranka nije u finansijskom izvještaju iskazala sljedeće transakcijske račune otvorene kod UniCredit bank dd: račun broj: 3381002202775253 (aktivan od 19.07.2017. godine) i račun broj: 3381302232458790 (aktivan od 22.12.2017. godine).

Imajući u vidu činjenicu da je stranka nije dostavila izvode ili drugu dokumentaciju za ove račune, ne možemo sa sigurnošću tvrditi da li je u 2017. godine bilo prometa po navedenim transakcijskim računima.

(3) Politička stranka u finansijskom izvještaju nije tačno iskazala prihode iz budžeta, čime je prekršila odredbe člana 13. i 19. Pravilnika.

¹ Izvod br. 13 koji je dostavljen kao posljednji izvod sa transakcijskog računa broj: 3382202201114941 kod UniCredit Bank dd u 2017. godini.

² Transakcijski račun sadrži 16 (šesnaest) cifara.

- Kontrolom izvoda sa transakcijskog računa Središnjeg ureda HDZ 1990, utvrđeno je da je stranka primila sredstva iz budžeta Opštine Pelagićevo u iznosu od 2.500,00 KM. Stranka nije u poslovnim knjigama evidentirala i u godišnjem finansijskom izvještaju iskazala prihode ostvarene iz budžeta Opštine Pelagićevo.
 - Uvidom u transakcijski račun OO Široki Brijeg broj: 3382202201114941 kod UniCredit Bank dd, utvrđeno je da su dana 09.11.2017. godine iz budžeta Grada Široki Brijeg stranci uplaćena sredstva u iznosu od 1.200,00 KM. Služba za reviziju je utvrdila da stranka nije u poslovnim knjigama i godišnjem finansijskom izvještaju iskazala prihode ostvarene iz budžeta Grada Široki Brijeg.
 - Hrvatska demokratska zajednica 1990 nije u poslovnim knjigama evidentirala i u godišnjem finansijskom izvještaju iskazala prihode iz budžeta Općine Gornji Vakuf-Uskoplje. Na osnovu podataka koje je dostavila Općina Gornji Vakuf-Uskoplje utvrđeno je da je stranka iz budžeta ove općine u toku 2017. godine primila sredstva u ukupnom iznosu od 8.112,00 KM. Sredstva su uplaćena na transakcijski račun OO HDZ 1990 Uskoplje broj: 3060240000550336 kod Addiko Bank dd.
 - Stranka nije u poslovnim knjigama evidentirala i u godišnjem finansijskom izvještaju iskazala prihode iz budžeta Općine Domaljevac-Šamac. Uvidom u podatke koje je dostavila Općina Domaljevac-Šamac, utvrđeno je da je stranka iz budžeta Općine Domaljevac-Šamac u toku 2017. godine primila sredstva u ukupnom iznosu od 2.000,00 KM. Sredstva su uplaćena na transakcijski račun OO HDZ 1990 Domaljevac-Šamac broj: 3060430000510896 kod Addiko Bank dd.
 - Na osnovu podataka koje je dostavila Općina Tomislavgrad, utvrđeno je da je stranka iz budžeta Općine Tomislavgrad u toku 2017. godine primila sredstva u ukupnom iznosu od 1.992,00 KM, te da su ista uplaćena na transakcijski račun broj: 33823002263383116 kod UniCredit bank dd. Stranka nije u poslovnim knjigama i godišnjem finansijskom izvještaju iskazala prihode iz budžeta ove općine.
 - Hrvatska demokratska zajednica 1990 je u godišnjem finansijskom izvještaju iskazala prihode iz budžeta Srednjobosanskog kantona u iznosu od 82.919,04 KM. Na osnovu dostavljenih podataka o uplatama sredstava iz budžeta Srednjobosanskog kantona i Općine Novi Travnik, utvrđeno je da je stranka iz budžeta Srednjobosanskog kantona primila sredstva u iznosu od 79.619,04 KM, a iz budžeta Općine Novi Travnik sredstva u iznosu od 3.300,00 KM.
 - Stranka je u obrascu 3-f iskazala sredstva primljena iz budžeta Općine Orašje u iznosu od 13.269,60 KM kao prihode iz budžeta Grada Banja Luka, te je prihode iz budžeta Općine Usora u iznosu od 2.076,00 KM iskazala kao prihode iz budžeta Grada Mostara.
- (4) Služba za reviziju je utvrdila da je stranka sredstva u iznosu od 6.800,00 KM primljena iz budžeta Bosne i Hercegovine po osnovu povrata takse za ovjeru političke stranke za učešće na izborima u poslovnim knjigama i godišnjem finansijskom izvještaju iskazala kao ostale prihode, čime je i ukupne prihode iskazala u većem iznosu u odnosu na ostvarene.
- (5) Stranka nije u obrascu 3-a (prilozi fizičkih lica) pravilno iskazala podatke o donatorima i iznosu priloga, niti je u potvrdi o prijemu priloga navela tačan iznos priloga i donatora, čime je prekršila odredbe člana 6. i člana 14. Pravilnika.

Stranka je godišnjem finansijskom izvještaju, u obrascu 3-a, iskazala prilog fizičkog lica Ivica Gašpar u iznosu od 3.400,00 KM. Takođe, stranka je izdala potvrdu broj: 001/17 od 30.06.2017. godine o prijemu priloga od fizičkog lica Ivica Gašpar u iznosu od 3.400,00 KM.

Kontrolom izvoda sa transakcijskog računa Središnjeg ureda, utvrđeno je da je navedeno fizičko lice stranci doniralo sredstva u iznosu od 2.950,00 KM, a da je fizičko lice Danijela Šakota dala prilog u iznosu od 450,00 KM, što je stranka trebala i iskazati u finansijskom izvještaju i potvrdi.

(6) Hrvatska demokratska zajednica 1990 nije u godišnjem finansijskom izvještaju i poslovnim knjigama pravilno iskazala troškove zakupa poslovnih prostora i obaveze prema zakupodavcima, čime su prekršene odredbe člana 21, 22. i 24. Pravilnika.

- Uvidom u raspoložive podatke utvrđeno je da Hrvatska demokratska zajednica 1990 nije iskazala troškove zakupa poslovnih prostorija koje su koristili OO Uskoplje u iznosu od 600,00 KM i OO Fojnica u iznosu od 2.400,00 KM.

- Stranka je troškove zakupa poslovnih prostorija koje je u 2017. godini koristio Središnji odbor iskazala u manjem iznosu za 16.750,00 KM u odnosu na ugovorenu cijenu zakupa. Prema podacima iz Ugovora o zakupu poslovnog prostora, mjesečni zakup iznosio je 2.500,00 KM, odnosno 30.000,00 KM godišnje. Stranka je u godišnjem finansijskom izvještaju iskazala troškove zakupa u iznosu od 13.250,00 KM.

- U godišnjem finansijskom izvještaju stranka je troškove zakupa iskazala u većem iznosu u odnosu na ugovorenu cijenu zakupa poslovnih prostorija koje su koristili OO Kreševo, ŽO SB Travnik, OO Vitez, OO Odžak, ŽO Posavina i OO Orašje, za ukupno 16.851,79 KM.

Naprijed navedeno ukazuje da stranka ne vodi potpune i pravilne evidencije o troškovima zakupa poslovnih prostorija, odnosno obavezama prema zakupodavcima.

(7) Stranka nije popunila obrazac 5 (obaveze političke stranke) godišnjeg finansijskog izvještaja u skladu sa odredbama člana 24. Pravilnika.

- Na osnovu podataka koje je dostavila Općina Gornji Vakuf-Uskoplje, utvrđeno je da obaveze Hrvatske demokratske zajednice 1990 po osnovu zakupa poslovnog prostora prema ovoj općini na dan 31.12.2017. godine iznose 800,00 KM. Stranka u godišnjem finansijskom izvještaju nije iskazala obaveze prema Općini Gornji Vakuf-Uskoplje.

- Stranka je u obrascu 5.2³ iskazala obaveze prema dobavljačima u zbirnom iznosu za ŽO Soli Tuzla i općinske odbore Kreševo, Bihać i Livno bez navođenja podataka o svakom dobavljaču pojedinačno.

(8) Stranka nije vodila potpune i pravilne evidencije o svojim rashodima, troškove je evidentirala u momentu plaćanja obaveza, a ne u momentu nastanka troška, te je u poslovnim knjigama i godišnjem finansijskom izvještaju pogrešno iskazala rashode, čime je prekršila odredbe člana 21. i člana 22. Pravilnika.

- Hrvatska demokratska zajednica 1990 je u poslovnim knjigama i obrascu 4.1 (režijsko-administrativni i ostali troškovi) godišnjeg finansijskom izvještaju za Središnji odbor iskazala troškove donacija fizičkim licima u ukupnom iznosu od 5.180,00 KM. Uvidom u izvode sa transakcijskog računa Središnjeg odbora i pojedinačne odluke o dodjeli pomoći utvrđeno je da su sredstva u iznosu od 1.550,00 KM isplaćena udruženjima, a da je 3.630,00 KM isplaćeno fizičkim licima.

Stranka na sredstva isplaćena fizičkim licima koja sa poreskog aspekta imaju karakter ličnih primanja, nije obračunala niti je uplatila porez i doprinose, čime je u poslovnim knjigama i godišnjem finansijskom izvještaju iskazala manje troškove i obaveze.

- Stranka je dostavila kopije odluka o isplati jednokratne pomoći fizičkim i pravnim licima za humanitarne rashode koji su iskazani u obrascu 4.1 ŽO SB Travnik u iznosu od 9.600,00 KM, odnosno obrascu 4.1 OO Travnik u iznosu od 5.040,00 KM.

Uvidom u pojedinačne odluke, utvrđeno je da je ŽO SB Travnik donio 64 odluke o isplati sredstava pomoći fizičkim licima i 17 odluka o isplati pomoći udruženjima u ukupnom iznosu od 12.900,00 KM.

³ U obrazac 5.2 (ostale obaveze) unose se sljedeći podaci: naziv organizacionog dijela političke stranke, naziv povjerioca ili obaveze, datum nastanka obaveze i iznos obaveze na određeni dan.

Kada je riječ o odlukama koje je donio OO Travnik, utvrđeno je da je ovaj organizacioni dio donio 23 odluke o isplati jednokratne pomoći od čega: 6 odluka o isplati sredstava pomoći pravnim licima, a 17 odluka o isplati pomoći fizičkim licima.

Služba za reviziju je utvrdila da ukupan iznos odobrenih sredstava ne odgovara iznosu koji je iskazan na kontu humanitarnih rashoda, te su odlukama ŽO SB Travnik i OO Travnik istim fizičkim licima dodijeljene pomoći više puta u toku godine.

Pored navedenog, a prema podacima koji su iskazani u godišnjem finansijskom izvještaju o rashodima navedenih odbora, utvrđeno je da stranka na sredstva isplaćena fizičkim licima koja sa poreskog aspekta imaju karakter ličnih primanja, nije obračunala niti je uplatila porez i doprinose.

- Na zahtjev za dostavljanje dokumentacije o troškovima promidžbe koje je Hrvatska demokratska zajednica 1990 iskazala u obrascu 4.2 godišnjeg finansijskog izvještaja za OO Prozor-Rama u iznosu od 15.230,83 KM, stranka je dostavila kopije računa i uplatnica. Uvidom u dostavljenu dokumentaciju utvrđeno je da je stranka u godišnjem finansijskom izvještaju za 2017. godinu iskazala troškove kampanje za izbore održane u 2016. godini: reklamni materijal, dnevnice i isplate posmatračima, troškove reprezentacije i ostale troškove, kao i interni prenos sredstava Središnjem odboru. Pored navedenog, stranka je u toku 2017. godine isplatila sredstva po računu iz 2012. godine u iznosu od 216,00 KM, koji je u godišnjem finansijskom izvještaju iskazala kao troškove tekućeg perioda.

- (9) Hrvatska demokratska zajednica 1990 je u skladu sa odredbom člana 12. stav (2) Zakona o finansiranju političkih stranaka⁴ imala obavezu da u godišnji finansijski izvještaj uključiti koristi ostvarene od aktivnosti udruženja „Hrvatski narodni sabor Bosne i Hercegovine“, koje je povezano sa političkom strankom, jer je stranka članica ovog udruženja⁵.

Troškovi kampanje na prijevremenim izborima za načelnika Općine Glamoč.

Tokom 2017. godine Hrvatska demokratska zajednica 1990 je učestvovala na prijevremenim izborima za načelnika Općine Glamoč.

Prema odredbama člana 15.10 Izbornog zakona Bosne i Hercegovine politička stranka za potrebe izborne kampanje ne smije potrošiti više od 0,30 odnosno 0,20 KM⁶ po biraču u svakom izbornom krugu, prema broju birača koje je objavila Centralna izborna komisija BiH. Hrvatska demokratska zajednica 1990 je u svrhu izborne kampanje, a prema podacima Centralne izborne komisije Bosne i Hercegovine, mogla da potroši sredstva u iznosu od 661,80 KM.

Pregledom godišnjeg finansijskog izvještaja, utvrđeno je da Hrvatska demokratska zajednica 1990 nije u obrascu 4.2 iskazala troškove predizborne kampanje za Općinski odbor Glamoč.

5.2 PREPORUKE

Preporučuje se Hrvatskoj demokratskoj zajednici 1990 da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da uspostavi i vodi poslovne knjige u skladu sa računovodstvenim propisima,***

⁴ Politička stranka obavezna je u svom izvještaju uključiti sve koristi ostvarene od aktivnosti subjekata koji su na bilo koji način povezani sa političkim strankama ili su pod njenom kontrolom.

⁵ Hrvatski narodni sabor Bosne i Hercegovine kao udruženje promoviše političke stranke i njene članove, učestvuje u provođenju izborne kampanje i kreira programe koji su bitni samo političkim strankama, članicama ovog udruženja.

⁶ Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednika RS, odnosno 20 feninga za izbore za članove kantonalnih skupština.

- *da vodi potpune evidencije o prihodima, rashodima i obavezama za sve organizacione dijelove političke stranke, te da obrati pažnju na troškove poreza i doprinosa na isplate koje imaju karakter ličnih primanja,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka, i*
- *da u finansijskom izvještaju iskaže koristi ostvarene od aktivnosti subjekata koji su na bilo koji način povezani sa strankom ili su pod njenom kontrolom.*

KOMENTAR:

Hrvatska demokratska zajednica 1990 je dostavila primjedbe na Preliminarni izvještaj o pregledu godišnjeg finansijskog izvještaja za 2017. godinu. Stranka je uz primjedbe dostavila potvrdu Grada Široki Brijeg o plaćanju zakupnine i pojedinačne odluke ŽO SB Travnik i OO Travnik o isplati pomoći fizičkim i pravnim licima koje sadrže potpis i pečat, što je Služba za reviziju uvažila, te je korigovala nalaze revizije iz Preliminarnog izvještaja o pregledu.

Šef Odsjeka za revizijske poslove, revizor

Sanja Tošović

Revizor

Nevenko Andan

Šef Službe za reviziju

Mr.sc Hasida Gušić